



www.BibleForChildren.org


Matyu 26



Ito ennem
nga algew
sacbay nito
Padaya Nitatalib,
nawè ngè Jèsus ka
Bètanya. Itu ya ili nè
Lasaru, nga igina to lalaki nga
pinagungar nè Jèsus itun. Ket to
Marya, namet itun ka isa
nga butilya nga
bangbanglu nga para labu.
Isa nga litru nga bangbanglu nga
naggayat ka mula nga nardu ya
mayan na, ket nangina nga unay, ta
tutu nga awan lauc na.



Ket
nibucbuc na
met to
bangbanglu kadiya
saka nè Jèsus, sè na
nipunas met ya ebbuc
na kadiya saka na.
Binumngaay ngarud ya ellab
nito bangbanglu ito baley.



Ket é Hudas Iskariyuté, nga isa kadito sangapulu ket duwa nga adalan, nawé itun kadito pangpangulu diya agsirsirbi iya Tèmplu, tasun makitulag nga iyawat na ngé Jèsus igida.




Ket naragsakan da ngarud ito nagicna da to nibaga
nè Hudas, ket kinariyan da nga écdan da kanu ka
kuwarta. Ket nagsicsiim ngarud
ngé Hudasin ka mayat nga
gundaway na nga
mangiyawat é
Jésus igida.



Ket tinungpal ngarud dito adalan to nibilin nè Jèsus. Ket iya agten iyan, nisagana da ya panggidam da nga panangilagip da ito Nitatalib. Ket ito mangmangan da pekkem, namet ngè Jèsus ka tinapay, ket nagyaman è Apu Diyus ka kararag. Pinisepisey na to tinapay, sè na nècdè kadito adalan, nga kinunen na, “Alac nu yani, sè kanen nu. Idi ya beggic,” kunen na.



Ket kalpasan na, namet pè ngé
Jésus ka paginuman. Nagkararag
manin nga nagyaman é Apu
Diyus, sé na nécdé igida, nga
kinunen na, “Uminum kayu kuma
nga amin idi. Ta idi ya dagac, nga
itu ya mangpalagda iya tulag né
Apu Diyus. Maiyayus ya dagac
nga agpaay kadiya
adu nga toltoley,
tasun
mapakawan
diya basbasul da.”



Ket kinunen nè Jèsus è Pèdru, “Ay, Simon, denggem
yani nga ibagac ikew: Napalubusan ngé Satanas nga
mangrribuc dakayu, nga maiyarig iya panagisap ka
beggas tasun maisibna ya nabaru iya bekken nga
nabaru. Ngem nikararagan naka è Apu Diyus, Pèdru,
tasun madi kuma mapukaw ya panamatim. Ket no
sumoli nad ikew ya
nabileg nga
panamatim iyaken,
masapul nga ikew
mettas ya
mangpabileg
kadiya padam
nga adalan,”
kunen na.



Ket kinunen ngarud nè Pèdru igina, “Apu, sisasagana ngac met nga maibulun ikew, ore y iya pagbaludan winno iya pakatayan,” kunen na. Ngem kinunen nè Jèsus, “Ya kinapudnu na, Pèdru, ita mettas nga gabi, sacbay niya panagtataraut diya kawitan no parbangun, namétlu nac nad met nga nilibac kin, nga kunem nad nga madi nac em-emmu,” kunen na.




Ket itun, nagbubulun dé
Jésus dito adalan na
nga nawé da iya isa nga
lugar nga managan ka
Gétsèmani. Ket kinunen
na kadito adalan na,
“Agtugew kayu was idi,
ta mawé yac agkararag
antuni,” kunen na. Ket
kinunen na iya kararag
na, “Ama! Amac!
Mabalinam ya amin.”



“Ipac mu kuma yani nga panagsagaba nga lak-amec, nga rigat nga arig nga inumec. Ngem bekken kuma ngarud nga ya tarigagay ku ya matungpal, no di lugud ya tarigagay mu,” kunen na.



Ket iya agten iyan, nawé to Hudas antuni nga nibagnus na ya isa nga bungguy diya suldadu sé duduma nga guwardiya niya Tèmplu nga eb-ebbonen dito pangpangulu diya agsirsirbi iya Tèmplu sé dito Parisiyu. Nagtagi-dilag sé nagtagi-armas da met nga nawé.



Ket kinteb ngarud mettin nito isa igida ya tagabu nito kangatuwan nga agsirsirbi iya Tèmplu, ket napéngas met to diwanan nga tinga nito tagabu win. Ngem kinunen nè Jèsus, “Bay-an tida ya agten iyan!” kunen na. Ket sinécdéng na ya natalingu nga tinga nito tagabu, ket pinalaing nan.




Ket tinkem da ngarud ngé Jèsusin, nga nipen da iya baley nito kangatuwan nga agsirsirbi iya Tèmplu. Ket é Pédru, tinumtumneb met igina. Ket dito uwed iya emwag nito baley, nagapuy da ka paginuduwan da iya tengnga nito emwag, ket nagtugtugew da ngarud iyanin. Ket é Pédru, nawé pé nakitugew igida.




Ket uwed pé isa nga toley
antuni nga isa kadito
tagabu nito kangatuwan
nga agsirsirbi iya
Tèmplu. Ket to tagabu,
kabagiyan met nito lalaki
nga pinéngas né Pédru to
tinga na itun. Ket dinamag pé
nito tagabu é Pédru nga
kinunen na, “Bekken kad nga
ikew to nasingec nga kabulun né
Jésus enna minuyungan?”
kunen na.



Ngem naglibac manin
ngè Pèdru, ket pag-isu
nga nagtaraut mettin
ya isa nga kawitan.
Ket rinumwar ngarud
ngè Pèdru iyan, ket
nagberrit ka napalausin.





Ket itun, amin dito pangpangulu nga naur-urnung iyan, nawé da nipen ngé Jèsus iya edyan nito Gubèrnadur Pilatu. Ket é Pilatu, sinaludsud na ngarud é Jèsus, “Tutu kad nga ikew ya Ari diya Hudyu?” kunen na. Ket kinunen né Jèsus igina, “Nakagi mun,” kunen na.



Ngem é Jêsus met ya gabay nè
Pilatu nga iruwar. Itu nga binaliwan
na ngarud manin to kinagi na kadito
toltoley. Ngem dito toltoley,
nip-ipkaw da manin nga kinunen da,
“Pailansam! Pailansam
ka krus!” kunen da.



Ket iya agten iyanin, niyawat nè Pilatu ngè Jèsus igidan tasun mailansa ka krus. Ket itun, nimet da ngarud ngè Jèsus, sè da niruwar iya siyudad nga Hèrusalèm, nga bugbugtungen na met ya krus na. Ket nipen da iya lugar nga maawagan ka Gulguta, nga itu ya kagi Hèbriyu nga kayat na nga kagiyen, “Edyan Bangabanga.”




Ket antuni nin to nangilansaan da igina ka krus. Ket uwed met pé duwa nga lalaki itun nga naikumpas é Jèsus, nga nailansa pé kadiya krus da.

Nagsumbangir diya krus da iya abay niya krus nè Jèsus, ket nagkintengnga ngé Jèsus.



Ket nagpaut to gicbet agingga ka alas trës iya gidam,
ta nagpukaw met ya darang niya sinag. Ket enna
Tèmplu, napigis met itun nga nagudduwa ngin to
kurtina nga nanglinged iya uneg na.

Ket è Jèsus ito krus na,
nagpekkaw met nga kinunen
na ka nabileg, “Ama, italec ku
ikew ya kararuwac,” kunen
na. Ket ito nakagi na yanin,
awan anges nan.



Ket itun, uwed isa nga toley nga nagtured nga nawé ito edyan né Gubérnadur Pilatu. Nawé ngarud nagadeng ka pammalubus né Pilatu nga alac na ya bangkay né Jesús, ta gumidam mettin. Ket yan


nga toley, ket é Husé nga taga-Arimatiya, nga isa nga mabigbig nga kunséhal diya Hudyu. Ket igina pé ya isa nga mangpadpadaan nga sinanama iya umbét nga panangituray né Apu Diyus.




Ket nawé ngarud ngimina ngé Huse
ka luput nga maawagan ka linén.

Ket ito naidasag na to
bangkayin, kinubit na ito
luput nga linén, sé na
nipisuc iya isa nga
tamen nga
nailiyang ka
batu.

Ket kalpasan na,
nangbukalig ka
dackel nga batu
nga nanggiset na
ito tamen.




Ket ito kadamlag na, itu ya Algew
Ngilin nga simarunu ito Algew
Panagisagana. Ket dito
pangpangulu dito
agsirsirbi iya Tèmplu,
sè dito Parisiyu, nawè
da naguurnung iya
sangu nito
Gubèrnadur
Pilatu.




Ket kinunen da, “Apu, malagip mi nga ito sibibiyag pekkem to mangal-allilaw nga toley, kinunen na nga, ‘Kalpasan nad niya tellu nga algew, agungar rac,’ kunen na met itun.”



“Ket iya agten iyan, nawé da ngarud. Ket nipasnec da nga tutu to panangbantay da ito tamen, nga uwed nibaldeng da nga pakadlawan da ito ruwangan na, sé pinabantayan da pé yin.”




Ket ito nalabes sin to Algew Ngilin, ito
gibegibet pekkem iya agsapa niya
Duminggu, nawè siningen de
Marya nga iMagdala se to
isa pe nga Marya to
tamen. Ket ya
napasamac itun,
uwed met
nakabilbileg nga
yegyeg.




Ket nairana met yan iya panagdessag niya isa nga anghèl nè Apu Diyus manipud ka langit. Ket nawè na nibukalig to dackel nga batu nga naigiset ito tamen, ket nagtugawan nan.

Ket nagpilpilig ngarudin dito guwardiya gapu ito ansing da ito anghèl, ket arig da nga natey yin.




Ket to anghél, kinunen na kadito babey, “Madi kayu mansing. Emmuc nga sapsapulen nu ngè Jèsus nga nailansa ito krus. Awan met idi nin. Ta nagungarin, nga agten mettas ito kinunen na. Umbèt nu singen to


nakaipaidaan
na itun.”




Ket gapu ito nasingen sè nagicna dito babey, naalistu da nga pimanawin ito edyan nito tamen, nga siaansing dan, sè siaanggem da met pé yin. Ket nanagtag da nga nawé mangibaga kadito adalan né Jèsus.



Ket ito uwed dito babey ito dalanin, uwed met iyanin ngé Jèsus nga simabet igida. Ket kinablaawan na da. Ket imadenni da ngarud è Jèsus, nga nagparintumeng da nga nicman da diya saka na, ket nagdaydayaw da igina.





Ket itun, nagpasingen pè ngé Jèsus kadito sangapulu ket isa nga adalan na, ito nagsasangu da nga mangmangan. Ket dinanengdengngan na da ngarud gapu ta di da gabay ya mamati, sè gapu ta nasukir da. Ta madi da met namati iya kagi dito nakasingen igina kalpasan nito panagungar na. Ket itun, kalpasan nito pannakitbar nè Apu Jèsus igida, ket naipangudu ka langitin. Ket enna langit, nagtugew iya kadayawan nga edyan, nga itu ya madiwanan nè Apu Diyus.



Tutu met yan, ta gapu iya napalaus nga
panagayat nè Apu Diyus kadiya toltoley
idi nga lubung, niyawat na ya kackaisu
nga Anac na, tasun amin nga mamati
igina, madi mapukaw, no di lugud
maécdan ka agnanayun
nga biyag.



Ruma 3:23 Ta amin tida, nagbasul tida met, ket awan dactida ya makabael nga mairaman iya nadayaw nga kasasaad nè Apu Diyus.

Ruma 6:23 Ta ya supapac niya basul, ket patey. Ngem biyag nga agnanayun met nga gennung ya isagut nè Apu Diyus dactida gapu iya pannakaibulun tida è Kristu Jèsus nga Apu tida.

Hébriyu 9:27 Ket no dactida nga toley, sigud nga naikeddeng nga matey tida ka mamènsan, ket kalpasan na, uwed pé yin ya panangukum nè Apu Diyus.



Épésu 2:8,9 Ta gapu was iya siaayat nga asi né Apu Diyus, ket naisalakan kayu ngarud gapu iya panamati nu. Ket ya pannakaisalakan nu, bekken ngarud nga gapu iya bukud nu nga winangel, no di lugud gapu ta nikaasi né Apu Diyus dakayu. Ta no mabalin tida nga maisalakan kuma gapu was iya winangel tida, mabalin nga uwed pagtangsit tida. Ngem bekken met nga agten iyan.

Ruma 10:9,10 Ket idi ngarud ya banag niya kagi nga ikaskasaba mi: No ibalikas mu nga ipakaemmum nga tutu nga é Jèsus ya ibilang mu nga Apum, sé no patiyem iya lemlemmet mu nga igina ket pinagungar ngarud né Apu Diyus, ket maisalakan ka nad met.

Ta gapu iya panamati tida nga tumaud iya lemlemmet tida, maibilang tida nga nalinteg iya imatang né Apu Diyus. Ket sé gapu pé iya panangibalikas tida nga panangipakaemmu tida maipanggep iya panamati tida, ket maisalakan tida.



Juan 3:16,17 Tutu met yan, ta gapu iya napalaus nga panagayat nè Apu Diyus kadiya toltoley idi nga lubung, niyawat na ya kackaisu nga Anac na, tasun amin nga mamati igina, madi mapukaw, no di lugud maécdan ka agnanayun nga biyag.

Ta nibon nè Apu Diyus ya Anac na idi nga lubung tasun maisalakan kuma diya toley gapu igina, nga bekken nga tasun ukumen na da.

1 Juan 5:11-13 Ket ya banag nidi nga panangipanecnec nè Apu Diyus maipanggep iya Anac na, agten idi: Nécdan nactida ngé Apu Diyus ka agnanayun nga biyag, ket ya Anac na mettas ya paggayatan niyan nga biyag.



Matyu 26-28; Lukas 22-24; Juan 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Adasen (tiu) © 1990 New Tribes Mission, Sanford, FL
32771-1487, USA. Printed in the Philippines.

<https://www.bible.com/en-GB/bible/2812/MAT.1>

©2025 Bible for Children, Inc.

www.M1914.org

www.bibleforchildren.org

